

Watendakazi wa Mungu

Maana dhiki yetu nyepesi, iliyo ya muda wa kitambo tu, yatufanyia utukufu wa milele uzidio kuwa mwingi sana—2 Wakorintho 4:17.

Ikiwa Paulo aliyetaabishwa, fadhaishwa na kuteswa kila upande, aliweza kuiita dhiki yake nyepesi, je, Wakristo wa leo wana nini cha kulalamikia? Mateso yetu ni mepesi kiasi gani yakilinganishwa na mateso mengi ya Paulo! Hayana thamani ya kulinganishwa na uzito wa utukufu wa milele unaowangoja washindi. Ni watendakazi wa Mungu, waliowekwa wakfu kwa ajili ya ukamilifu wa tabia. Hata kama kujinyima na kuteseka kwa Mkristo kuwe kukubwa jinsi gani, hata kama njia ya majaliwa itaonekana kuwa giza na isiyoweza kuchunguzika, anapaswa kufurahi katika Bwana, akijua kwamba yote hutendekeka kwa ajili ya manufaa yake.

Ni watu wangapi wanamhuzunisha Roho wa Mungu kwa kuendelea kulalamika! Hii ni kwa sababu wameshindwa kabisa kumwona Yesu. Kama tukimwangualia Yeye ambaye alichukua huzuni zetu na aliyekufa kuwa kafara yetu, ili tuweze kuwa na utukufu mkubwa zaidi, tutaziona huzuni na majaribu yetu makuu kuwa mateso mepesi. Mtafakari Mwokozi juu ya msalaba, aliyechubuliwa, aliyepigwa, aliye dhakiwa, lakini asiyelalamika na asiyekinzana, akiteseka bila manung'uniko. Huyu ni Bwana wa mbinguni, ambaye kiti Chake cha enzi ni cha tangu umilele, alistahimili mateso na aibu hii yote kwa ajili ya furaha ambayo ilikuwa imewekwa mbele Yake furaha ya kuwaletea wanadamu zawadi ya uzima wa milele.

Usikivu unapokazwa kwenye msalaba wa Kristo, nafsi kamili inaadilishwa. Ujuzi wa upendo wa Mwokozi unatiisha nafsi na kuinua akili juu zaidi ya mambo ya muda na ya kufikirika. Hebu natujifunze kupima mambo ya kitambo katika nuru ambayo inang'aa kutoka msalabani. Hebu na tujitahidi kuelewa undani wa fedheha ambayo Mwokozi wetu aliiridhia ili kumfanya mwanadamu kuwa mmiliki wa utajiri wa milele. Kadiri tunavyojifunza mpango wa ukombozi, moyo utahisi mapigo ya upendo wa Mwokozi na utajazwa furaha na uzuri wa tabia Yake.

Ni upendo wa Yesu ambao unafanya mbinguni kuwa pazuri. Lakini tunapojitahidi kuelezea upendo huu, lugha inatukwamisha. Tunapofikiri juu ya maisha Yake duniani, juu ya kafara Yake kwa ajili yetu; tunaitafakari kazi Yake mbinguni kama wakili wetu, juu ya makao Anayowaandalia wote wampendao Yeye; na tunaweza kutamka tu "Ni kikubwa kiasi gani, kilele na kina cha upendo wa Kristo!" Tunapokaa chini ya msalaba, tunapata dhana hafifu ya upendo wa Mungu, na tunasema, "Hili ndilo pendo, si kwamba sisi tulimpenda Mungu, bali kwamba Yeye alitupenda sisi, akamtuma Mwanawe kuwa kipatanisho kwa dhambi zetu." Lakini katika kumtafakari Kristo, tunabaki tu kwenye ukingo wa upendo usio na kipimo. Upendo Wake ni kama bahari kubwa, isiyo na mwanzo wala mwisho.

Ndani ya wafuasi wote wa kweli upendo huu, kama moto Mtakatifu, unawaka kwenye madhabahu ya moyo. Ilikuwa ni hapa duniani ambapo upendo wa Mungu ulifunuliwa kupitia Bwana Yesu. Ni hapa hapa duniani ambapo watoto Wake wanalazimika kuuruhusu upendo huu ungaze kwa njia ya kuishi maisha yasiyo na lawama. Hivyo ndivyo wenye dhambi wanavyoweza kuongozwa msalabani na kumtazama Mwana-Kondoo wa Mungu (*The Review and Herald*, Mei 6, 1902).